

Restauracion di e retabulo neo gotico di Misa Santa Anna a bin cla

DESPUES di e tornado di 25 di augustus 2011 Parokia Santa Anna a traha duro pa reconstrui e dak y e misa su interior.

Ora e trabaonan aki a finalisa a bin cu un plan pa restaura e retabulo (altar) neo gotico.

Den un periodo di 1 aña a traha 2 artista pa reconstrui e imagen di Mama Maria, e preekstoel y mesa di altar, e mesanan di comunion y diferente imagen nan di palo.

Despues a bin e aña aki 3 otro artista pa traha riba e retabulo. Y nos por informa cu e trabaonan riba e retabulo a keda cla. Y e retabulo a keda masha bunita mes.

Por bisa cu no a reconstrui, pero a restaura e retabulo.

Durante di e restauracion a sali diferente dato graba den e altar adilanti, e.o. e fecha cu sr. Hendrik v. d. Geld a construi e retabulo, cu ta 1860.

Otro dato cu ningun hende a cay riba dje t'e inscripcion, scirbi den Latin: Altare Privilegium quotidianum perpetuum.

Traduccion ta: N'e altar aki tin privilegianan perpetuo mara. (NL: Aan dit altaar zijn eeuwigdurende voorrechten verbonden: ES; En este altar están atadas privilegios perpetuos).

E nificacion ta:

"E altar privilegiá pa (haci Misa) cada dia pa semper (den eternidad)".

E artista nan a investiga e datonan aki. Y a descubri cu según e Ley Canonico di CIC 1917 Can. 916 un altar cu e privilegio aki ta otorga indulgencia plenario cada biaha cu un Santo Sacrificio di Misa wordo celebra n'e altar aki.

Nos kier a gradici e parokianonan di Noord, tur Catolico na Aruba, e pueblo di Dios na Aruba y e pueblo di Aruba en general pa nan aporte y donación y cooperación cu a haci posibel cu e retabulo bunita y histórico aki por keda preserva pa mas generacion cu lo bin despues di nos.

Cu Señor drama su bendicion ricamente riba nos parokianan y e pueblo di Dios na Aruba.

Un invitación ta bay na tur hende di Aruba pa bin bishita nos misa pa aprecia nos retabulo bunita aki. Y asina ricibi grancianan.

Di curazon: Masha Masha Danki.

